



Suđenje za eksploataciju radnika za rad u Azerbejdžanu Milioni uplaćivani na račune off shore firmi Ministarstvo omladine i sporta Azerbejdžana imalo ugovor vrijedan preko 44 miliona dolara sa Vučenovićevom firmom

U Sudu Bosne i Hercegovine u srijedu je nastavljeno suđenje Boži Vučenoviću i još 12 optuženih za organizovani kriminal, trgovinu ljudima i pranje novca, u vezi sa radnom eksploatacijom više od 600 osoba, vrbovanjem državljana BiH, Srbije i Makedonije za rad u Azerbejdžanu.

Računi u sedam država

Kao svjedok i vještak odbrane, pred Sudskim vijećem svoj iskaz je dao Dragan Jovanović, nekadašnji uposlenik **SIPA-e**, koji je analizirao finansijsku dokumentaciju i tokove novca, te uplate novčanih sredstava firmi Serbaz, koja je u vlasništvu braće Bože i Milana Vučenovića.

Jovanović je kazao da je Ministarstvo omladine i sporta Azerbejdžana **SIPA-i** dostavilo dokumentaciju u kojoj se vidi da je ovo ministarstvo imalo ugovor sa Vučenovićevom firmom, koja je radila na rekonstrukciji objekata.

Prema Jovanovićevim riječima, ukupna vrijednost zaključenih ugovora s azerbejdžanskim ministarstvom je preko 44 miliona dolara, koji su uplaćivani na račune off shore kompanija, između ostalog, iz Paname, Hong Konga, Novog Zelanda i drugih zemalja.

-Trag o pronevjeri novca vodi u Azerbejdžan i može se dovesti u vezu sa neisplaćivanjem radnika. Novac je uplaćivan na račune off shore kompanija u sedam država, a

dalje je prebačen na račune u Crnoj Gori, a potom i u BiH, Srbiji i Makedoniji. Postoji osnov sumnje da je ovdje počinjeno krivično djelo pranje novca - kazao je Jovanović.

On je, pored toga, analizirao i izjave radnika koji su radili u Azerbejdžanu. Prema Jovanovićevim riječima, analizirana je 91 izjava radnika, od kojih je samo za plaće njih 58 oštećeno oko 417.000 dolara, 36 radnika za 12.450 dolara, dok za 31 radnika nije bilo podataka.

Sudskom vijeću obratio se optuženi Milan Vučenović, koji je kazao kako se sav novac koji su oni „donijeli“ nalazi u BiH.

-Investirali smo u proizvodnju, a ne u kockarnice. Ništa nismo odnijeli, već smo donijeli

kući, koju volimo. Te pare niko u kesama nije donosio u našu državu, niti je kesama iznosio iz BiH - kazao je Vučenović.

Tužilaštvo BiH je, podsjećamo, krajem juna prošle godine podiglo optužnicu protiv braće Bože i Milana, te Nedeljka i Miroslava Vučenovića, Radeta Ljubičića, Saše Lipovca, Safeta i Rasima Turanovića, Nenada Tatića, Slaviše Kojića, Zorana Dmitrovića, Zorana Kalajdžića i Novaka Čirića.

Trgovina ljudima

Istragom koju je provelo Tužilaštvo BiH, utvrđeno je da su optuženi, iskoristivši težak finansijski položaj i ugroženu egzistenciju radnika, u periodu od 2007. do 2009. godine, organizirali odlaske više od šest stotina građana na navodni rad

i zaposlenje u Azerbejdžanu.

Po vrbovanju u BiH i dolasku u stranu zemlju, radnici su držani u nečovječnim uvjetima i neadekvatnom smještaju, uz uskraćivanje plaćanja dogovorenih naknada za rad, novčana kažnjavanja, te su tjerani da rade prekovremeno bez mogućnosti odbijanja takvog rada, čime je počinjeno krivično djelo trgovine ljudima.

Na ovaj način, optuženi su eksploatirajući žrtve ostvarili nezakonitu imovinsku korist u višemilionskim iznosima, koju su držali na više računa u nekoliko država, a prema prikupljenim dokazima radi se o iznosu oko 5,9 miliona KM.

B. P.



Više stotina radnika držano u robovlasničkom odnosu